

四庫全書

史部

欽定四庫全書

史部

皇朝文獻通考卷二百二十三  
四

中書<sub>臣</sub>張經田覆勘

總校官檢討<sub>臣</sub>何思鈞

欽定四庫全書

皇朝文獻通考卷一百二十三

經籍考

史地理

臣等謹按地理一門條目綦繁禹貢所紀職方所  
掌其書古矣後人著錄體例雜糅要其編排不容  
無次四庫全書所紀宮殿而下首總志次都會郡  
縣次河渠次邊防次山川次古蹟次雜記次遊記

次外記部別州居迥殊馬考之叢雜今從其例輯之

欽定皇輿表十六卷

康熙十八年翰林院掌院學士扎薩哩等奉

敕纂四十三年翰林院掌院學士揆叙等奉

敕增修

聖祖仁皇帝御製序曰粵稽在昔帝王體國經野莫不坐撫輿圖協同倫軌所以禹貢山川繫以州域職方風土

辨乃井疆簡牒之所陳詩書之所紀粲然其可覩矣朕  
萬幾時暇加意問學自經史而外凡可羽翼大猷兼資  
治理者咸務旁搜博討觸類貫通顧循覽地輿稱名屢  
易以今準古端緒棼如考鏡之餘不能無遺憾焉從來  
土壤有定建置無常上溯唐虞下迄勝國閱四千年之  
久歷二十三代之遙損益廢興難以具舉可證據者莫  
如正史而正史復有差訛至詳備者莫如通志而通志  
更多附會一統之世沿革尚殊竊據之秋紛糾益甚異

同錯見名實不符非極汴流窮源之力何以規千載於  
目前疆方輿如掌上哉夫從志體則此詳彼略間有闕  
遺從表體則地緯時經期于徵信用是特命儒臣仿史  
表例校讐編輯或始分而後并或暫合而終離郡屬統  
名縣稽實土總前史以鉤索彙百派於同源信所謂若  
網在綱有條不紊者也書成進御凡若干卷名曰皇輿  
表仍製序簡端俾垂永久豈獨畫疆析理較若列眉其  
間都邑之變更控扼之形勝爭戰之地利設險之遺規

固有不踰席而周知一展卷而畢照者則是書佐歷代地志之不逮周資治理其庶幾歟

聖祖仁皇帝御製增修皇輿表序曰皇輿表一編肇成於康熙己未製序卷端時置几案歷有年所顧原編紀載沿革於郡縣特詳其地列輿圖而未設有郡縣者概未編入朕惟國家統御方夏覆載之內視均一體外藩蒙古諸屬國自古

祖宗朝後先收服次第歸誠迨朕臨御以來藩王君長歲

時貢琛悉比內地繡壤相錯不啻萬有餘里邇者喀爾喀青海部衆稱臣嚮附土宇益廓計其山川封域斥堠之所屆分野之所屬皆按地而可考也至于山陬海澨新隸職方者二十餘年間建州樹邑往往而有又若朝鮮交趾諸國之奉職惟虔邊徼土目之革心效順亦從來志方輿者所宜備載爰命儒臣更加增輯共十有六卷書成特命刊梓用示來茲於戲幅員延袤亦云廣矣而蕃生息厚風俗之道則實資于廟堂之經理朕開編



循覽深念高卑險易形勢不齊燥濕剛柔風氣各異然  
而秉彝恒性遐邇皆同朕以一身為中外元元主惟是  
張官置吏以牧民生禁暴設防以禦民患既鞠養之務  
徧尤教化之宜周早夜孳孳無日不心通乎四海九州  
之隱書不云乎自朝至于日中昃不遑暇食用咸和萬  
民凡我後人覩是編者知創造之維艱思懷柔之不易  
則千百禩無疆之歷服其庶克永荷

天庥也夫

欽定方輿路程考略

不分卷

臣等謹按是書無刊本康熙中中允汪士鋐等奉

敕撰進以各直省為經以府州縣為緯各直省及各府州縣皆序以次首考至

京師路程次考四境壤接之道里遠近兼詳歷代建置沿革及山川關梁古蹟寺觀祠墓至若

皇朝肇建之規模

聖製詩文之美富敬謹紀載用昭明備而古今藝文足資

考證者亦間錄云

大清一統志五百卷

乾隆二十九年奉

敕撰

皇上御製序曰惟

上天眷顧我大清全付所覆海隅出日罔不率俾

列祖

列宗德豐澤溥威鑠惠滂禹迹所奄蕃息殷阜瀛壖炎島

大漢蠻貊咸隸版圖置郡築邑聲教風馳藩服星拱  
稟朔內附六合一家遠至開闢之所未賓梯航重譯  
歷歲而始達者慕義獻琛圖于王會幅隕袤廣古未  
有過焉

聖祖仁皇帝特命纂輯全書以昭大一統之盛卷帙繁重  
久而未成

世宗憲皇帝御極之初重加編纂閱今十有餘載次第告  
竣自京畿達于四裔為省十有八統府州縣千六百

有奇外藩屬國五十有七朝貢之國三十有一星野  
所占坤輿所載方策所紀憲古證今眉列掌示圖以  
臚之表以識之書成凡三百五十餘卷夫肇十有二  
州見於虞典禹貢一篇備列九州疆域山川土田貢  
賦物產實為方志之權輿周禮大司徒以天下土地  
之圖周知地域廣輪之數辨其山林川澤邱陵墳衍  
原隰之名物土訓道地圖誦訓道方志職方氏掌天  
下之圖辨其邦國都鄙四夷八蠻七閩九貉五戎六

狄之人與其材用九穀六畜之數漢郡國地志與計書俱上太史厥後寰宇志記列于正史者代數十家蓋將以觀民設教體國經野表皇威之有截明王道之無外匪徒備掌故徵博洽已也撫疆宇則念肇造之難稽制置則念經畫之要采謠俗則念化導之方考循良人物而知治理之效念所以振興而長育之核戶口土賦而察登耗之故念所以懷保而蕃殖之書曰皇天既付中國民越厥疆土于先王肆王惟德

用和懌先後迷民用懌先王受命我

祖宗克明峻德以有九有之師傳緒在予敢不惟德之勤

篤

前人成烈其在我內外百職事慎固封守阜成兆民懋相  
予修和有夏亦越我後嗣子孫咸敬厥德以昭受丕  
基萬年惟無斁覽斯編也其善體諸

臣等謹按康熙間刑部尚書徐乾學奉

敕總裁一統志罷歸之頃奏請設局于蘇州之洞庭山一

時稱地理之學如顧祖禹閻若璩黃鴻胡渭等皆  
與其役而迄未有成

世宗憲皇帝敕館修輯至乾隆九年奏竣嗣以我

皇上天威震疊勘定西域拓地二萬餘里為自古興地  
所未紀而各省添設裁併府廳州縣與職官之增  
減移駐亦多與舊制異同乃奉

詔重修每省皆先立統部冠以圖表首分野次建置沿  
革次形勢次職官次戶口次田賦次名宦皆統括



一省者其諸府州縣及直隸州又各立一表而系以所屬皆首分野次建置次沿革次形勢次風俗次城池次學校次戶口次田賦次山川次古蹟次關隘次津梁次堤堰次陵墓次寺觀次名宦次人物次流寓次列女次仙釋次土產分門二十有一而外藩及朝貢諸國咸附錄焉又以乾隆四十年勘定再馳開屯列戍販章益廓因並載入簡編蓋我

國家土宇宏開

德威遐播山河兩戒並隸職方自有書契以來誌輿圖者孰有如是之大一統而擴無外者乎

天下郡國利病書一百二十卷

顧炎武撰炎武見經類

增訂廣輿記二十四卷

蔡方炳撰方炳見政書類

臣等謹按明陸應陽曾作廣輿記方炳取而增訂

之然大抵鈔襲明一統志而於前代之規模皆未  
及考證焉

閱史津逮

無卷  
數

朱約淳撰約淳字博成餘姚人順治辛丑進士官  
泰安縣知縣

歷代輿地徵信編殘本六卷

錢邦寅撰邦寅字馭少丹徒人

山河兩戒考十四卷

徐文靖撰文靖見經類

凡例曰唐書天文志一行大衍厯厯議十篇八曰分野謂天下山河之象存乎兩戒分南北以界之文靖上考分星下稽輿地卷首為圖二十有四書凡十四卷前八卷注唐志也後六卷參考晉隋宋三史文靖所附也其中補春秋列國一百七十有九合一行所分載者總三百一十仍列于各次之下至於三垣五緯雲漢之始終雜星之妖瑞亦別

為一條載在卷末

古今約說

無卷數

邵元龍撰元龍松江人

右地理類總志

皇清職貢圖九卷

乾隆十六年大學士傅恒等奉

敕撰

臣等謹按是編首列朝鮮以下諸外藩次列諸藩

諸蠻各以所隸之省為類恭際

聖武遠揚平定西域拓地二萬餘里增入各部落三百  
餘種分圖系說共為七卷乾隆二十三年告  
成迨二十八年以後愛烏罕霍罕齊齊王斯謬爾  
根齊諸部咸奉表入覲土爾扈特全部自俄羅斯  
來歸雲南整欠景海諸土目又相繼內附乃廣為  
續圖一卷每圖各繪其男女之狀衣冠之別纖悉  
畢陳一一徵諸實見於以知我

國家威稜震疊

德化遐宣河源月蝓之外重九譯而來者洵非兵革所能致而

保泰持盈之意猶具著於

御題長律之中宜乎膺

景命而申錫無疆者益鞏金甌于萬禩已

欽定皇輿西域圖志五十二卷

乾隆二十一年大學士劉統勲等奉

敕撰

皇上御製序曰語云耕當問僕織當問婢志廣輿者不  
稽之歷代建置沿革將無從數典而志西域則有不  
能盡稽之歷代者實以幅員所限言語不通雖漢唐  
盛時亦頗能威行天山迤北建官設都而天山迤北  
本不能至也即有一二羈縻之國然叛服不常征調  
弗應又安能履其地而疆索之哉且漢唐之程督異  
域者仍漢唐人而已其與準噶爾回部人語奚啻粵



問而燕答則其所記魯魚亥豕之分不待言而可知  
茲者叨

天佑藉羣力湊時會幸成是役準噶爾回部之人皆在廷  
執事而國語切音譯外藩語又甚便且易我諸臣馳  
驅往來其間目覩身歷非若耳聞口傳者比俾司校  
勘而正其訛傳其真較僕婢耕織之問為尤詳且厄  
魯特語及回語朕亦因暇而習焉時御丹檠為之改  
正是西域志之書必應及是時成之用開歷代之羣

疑垂千秋之信錄間亦涉及諸史以存述古總計分部一十有八分卷四十有六繪圖系說蔚為完書若夫闢地歲功文臣或有過頌朕所不取惟是籌耕牧計久長圖所以永

乾貺奠丕基思日孜孜持盈益凜予安得有功成無事之說哉

欽定日下舊聞考一百二十卷

乾隆三十九年奉

敕撰

臣等謹按是編據朱彝尊曰下舊聞原本於十三門外增苑園官署二門而併石鼓考於國子監刪繁補缺援古證今詳加考覈定為此本至於

列聖宸章

皇上御製涉於

神京風土者悉案門恭載以昭垂典實凡原本所撫引古書古蹟並承

聖訓指示精詳正訛補漏一一徵驗有無勘其所在千古輿圖紀述都邑孰能如是之信而可徵者哉

欽定滿洲源流考二十卷

乾隆四十二年大學士阿桂等奉

敕撰

臣等謹按是編列為四門一曰部族述肅慎氏以下源流二曰疆域附以宮室建置及古蹟三曰山川凡白山黑水諸名勝悉皆採列四曰

國俗以官制及文字附焉蓋我

朝自白山天作朱果靈彰年紀綿長見聞或異我  
皇上溯發祥之有自慮傳信之無徵

特命纂輯是書援引舊文考驗地理據見聞之實汰史  
傳之訛本本原允堪垂示千古洵讀史家所宜  
奉若球圖者矣

欽定蒙古源流八卷

蒙古小徹辰薩囊台吉撰乾隆四十二年奉

敕譯進

臣等謹按是書體例頗與永樂大典中所載元朝  
祕史相類大旨以佛教為綱而並載蒙古之世系  
始末興衰治亂之迹其于塞外立國傳授源流以  
及人名地名語言音韻皆極詳核自非中國史官  
附會影響者可比惟閒及內地之事未能盡確前  
此我

皇上因元戎奇渥溫得姓所自必有傳訛詢之定邊左

副將軍喀爾喀親王成衮扎布乃以此書進

御而後奇渥溫為却特之誤昭然共明

特命以是編宣付館臣譯以漢文排比成帙從前之沿訛襲謬今皆釐訂精詳不特仰窺

聖學之神奇且益以見中外一家之盛焉

欽定盛京通志一百卷

乾隆四十三年大學士阿桂等奉

敕撰

臣等謹按凡例曰

盛京為

王迹肇基首隆

謨誥我

皇上四詣陪京大文彌耀謹志

聖製

綸音

天章弁諸志首考卜



興京遷都遼瀋為豐鎬遺規至若

壇

廟

宮殿

山陵創制典禮嚴重謹稽

實錄及會典諸書詳志以彰規制星野建置疆域山川城

池皆遵

旨訂正悉載舊名並恭錄

開國戰蹟其疆里遠近謹遵

欽定輿圖詳核疆識舊志闕津於吉林黑龍江邊門多  
所闕畧戶口田賦於旗田莊官園場賦則亦多疎漏  
茲悉詳訂增所未備志職官次官署以專職守志  
學校次選舉以簡才良武備尤要增志兵防名宦  
以彰治行人物以勵材能舊志於遼金宗室俱不  
載又但志遼瀋不及吉林黑龍江未為核備今悉  
增入至

開國功臣事蹟謹遵

國史傳按其於

盛京有治行戰蹟者一一臚載其事在入關以後者  
詳見

國史及八旗通志茲不備錄忠孝節義文學隱逸流  
寓方伎仙釋列女皆足以資采訪驗風教悉志如  
例祠祀有關祭法

翠華四莅遼渾諸河特建專祠古剎精藍亦多蒐輯謹

志祠祀又古蹟舊志繁簡失當茲詳考史傳分隸  
郡縣名勝各以類次奉天風俗淳樸物產豐饒茲  
博稽前史謹遵

欽定滿洲源流考詳晰編纂志風俗物產並旁采異聞  
為雜志一卷列朝藝文舊志體例未協兼多遺闕  
今蒐羅史集按照時代分體編輯至

國朝藝文凡臣下賦頌及賡紀詩篇俱各依類編次  
讀是編者撫今考昔展卷瞭如不獨

留都典故燦著寰瀛而

列聖啟佑之鴻規亦昭垂於無極也已

欽定熱河志一百二十卷

乾隆四十六年戶部尚書和珅等奉

敕編輯

皇上御製序曰為各省之志書易為熱河之志書難彼其以漢人書內地事且各府州縣本有晉乘楚檮杌薈而輯之其易也不待燭照數計而龜卜也熱河之

志則以闕外荒畧非內地而遼金元之史成於漢人之手所謂如越人視秦人之肥瘠忽然故曰難夫遼金元非若唐宋之興於內地而據有之也又其臣雖有漢人通文墨者非若唐宋之始終一心於其主語言有所不解風尚有所不合且遼金元皆立國不久旋即遜出則所紀載欲其得中得實蓋亦難矣夫遼金元之史紀內地而欲其得中得實尚且難之況紀邊闕以外荒畧之地乎其不能得中得實亦益明矣

當今之時熱河之志不可不成者則以本朝荷

天之寵百有餘年累洽重熙漢人已數世被覆載生育其  
語言風尚薰陶漸漬不可以遼金元之漢臣例之亦  
理之必然況我

皇祖建山莊於此地非為一己之豫遊實貽萬世之締構  
而顧可無書以垂永久乎山莊內本有溫泉出而匯  
武列之水俗遂有熱河之稱茲雖為府為縣而仍以  
熱河稱之者存其朔便於衆也

皇祖有詩云聚民至萬家蓋軍路之際人煙尚少後乃閭閻日以富耕桑日以闢至于今將百年屹為都會

皇祖雖嘗名之曰避暑山莊序詠三十六景而未輯志者其或有待耶抑亦文獻不足徵而遲遲為之耶山川里邑建置沿革與夫古蹟人物司事之臣雖摭摭遺逸猶有未備未信者其說具見於前而吾之序是書以行世者正所云在此不在彼

臣等謹按志以熱河名者



行殿所在不得冠以州郡之目也地即古武列水遼金  
元以來皆陪京重鎮

太宗文皇帝泰武宏昭先定其地嗣康熙中喀爾喀納土  
輸誠益宏文園

聖祖仁皇帝因建避暑山莊於此  
鑒與歲莖凡以

省方奮武答中外之就瞻我

皇上紹繩

先緒亦以每歲夏秋

翠華行幸攜漿擁簪而迎者率以為常

盛典頻仍史不勝紀是編所載首

天章次

巡典次徠遠次

行宮次圍場次疆域次建置沿革次晷度次山次水次

學校次藩衛次寺廟次文秩次兵防次職官次宦

蹟次人物次食貨次物產次古蹟次故事次外紀

次藝文凡二十四門並考古證今析疑徵信實與  
記之大觀為古今所未有也

畿輔通志一百二十卷

兵部尚書直隸總督李衛等監修

臣等謹按北平自元建都以後有析津志諸書明  
代各省皆有通志而獨闕畿輔至我

朝康熙十一年巡撫于成龍等始創成之雍正七年  
復遵

旨重修督臣唐執玉劉于義李衛等遞董其事雍正十三年書成

江南通志二百卷

兵部尚書兩江總督趙宏恩等監修

臣等謹按康熙二十二年部檄兩江總督于成龍江蘇巡撫余國柱安徽巡撫徐國相等創修通志編成凡七十六卷雍正七年署兩江總督尹繼善等遵

旨重修其後督臣趙宏恩江蘇撫臣顧琮安徽撫臣趙國麟等相繼董成凡隸上江者安徽藩司主之隸下江者江蘇藩司主之乾隆元年書成

江西通志一百六十二卷

江西巡撫都察院右副都御史謝旻等監修

臣等謹按明嘉靖間參政林庭棨創為省志其後久不修輯遂至散佚

國朝康熙二十二年巡撫安世鼎五十九年巡撫白

璜相繼重修名曰西江志雍正七年又遵

旨增修十年書成

浙江通志二百八十卷

文華殿大學士兼吏部尚書兼管浙江總督嵇曾  
筠等監修

臣等謹按明提學副使薛應旂嘗于嘉靖中輯浙  
江通志七十二卷

國朝康熙二十一年總督趙士麟巡撫王安國復因

薛志增修為卷五十分門三十有七雍正七年督  
臣嵇曾筠李衛郝玉麟程元章撫臣王國棟提督  
李燦等遵

旨相繼重修增為五十四門十三年書成

福建通志七十八卷

兵部尚書浙閩總督郝玉麟等監修

臣等謹按福建輿地諸書惟明黃仲昭八閩通志  
為最善自我

朝開國以來建置沿革與昔多異雍正七年

命各省纂輯通志督臣郝玉麟撫臣盧焯學臣周學健等

導

旨增修舊志凡六十四卷尋以增設臺灣福寧二府永春

龍巖二州續十四卷乾隆二年書成

湖廣通志一百二十卷

總督湖廣等處地方兵部尚書兼都察院右副都

御史邁柱等監修



臣等謹按前史所載楚中輿記不下數十家其非殘缺散亡即冗雜闕漏

本朝康熙二十三年遂創成通志雍正七年復

命增輯督臣邁柱並湖北撫臣魏廷珍王士俊德麟湖南撫臣趙宏恩等遵

旨重修十一年書成

湖南通志一百七十四卷

大學士陳宏謀等監修

臣等謹按湖廣全省在唐分武安荆鄂二鎮在宋分荆湖南北兩路至明代始合為一

國初尚沿其舊至康熙三年析置湖南布政司於是復分為兩省後邁柱等修通志時依上下江之例亦合湖南北為一書乾隆二十一年宏謀巡撫湖南以全志詳於北而畧於南遂與藩臬諸臣復為蒐輯於全志之所無者則增而有之全志之所缺者則補而全之分類三十有七而卷帙之富反過

于全志云

河南通志八十卷續通志八十卷

總督河南山東軍務兵部右侍郎王士俊等監修  
巡撫河南兵部侍郎阿思哈等重修

臣等謹按中州之地明初惟有各郡縣偏記至嘉  
靖中始有成書然未為詳悉順治十五年河南巡  
撫賈漢復令分巡大梁道副使沈荃纂通志五十  
卷分三十類雍正七年遵

旨重修督臣田文鏡王士俊撫臣孫國璽河督嵇曾筠朱藻白鍾山副總河阿蘭泰劉勦學臣吳應棻鄒升恒等相繼代領其事增為八十卷十三年書成迨我

皇上御極之三十一年

詔重修一統志徵直省通志上諸史館巡撫阿思哈因取原書補其遺闕復增八十卷

山東通志三十六卷

巡撫山東都察院右副都御史岳濬等監修

臣等謹按舊志始於明嘉靖中巡按御史方遠  
宜副使陸鉞等為卷四十為目五十有二附目  
十

國朝康熙十二年巡撫張鳳儀藩司施天裔再輯擴  
前志十之三四雍正七年濬與法敏等又遵

旨重修十三年書成

山西通志二百三十卷

巡撫山西都察院右副都御史覺羅石麟等監修  
臣等謹按明成化中督學僉事胡謐嘗撰為通志  
至嘉靖中副使周斯盛萬厯中按察使李維禎嘗  
兩修之

國朝康熙二十一年提督學政劉梅又踵事排纂分  
類三十有二雍正七年遵

旨重修十二年書成

陝西通志一百卷

署理陝西總督吏部尚書劉於義等監修

臣等謹按舊志五十卷為康熙初年巡撫賈漢復  
所編雍正七年遵

旨重修董其事者督臣查郎阿劉於義撫臣史貽直瑪爾  
泰碩色學臣王蘭生等取原書增為百卷十二年  
書成

甘肅通志五十卷

巡撫甘肅都察院右副都御史許容等監修

臣等謹按明代甘肅府州即隸陝西至

本朝康熙年間始別為一省雍正七年有增修通志  
之

命於是容等遵

旨纂修其凡例曰甘肅舊無志統於陝西通志中陝西詳  
於西安延安鳳翔漢中興安諸郡而畧於平鞏臨  
慶至河西諸衛所則尤在所畧今分二省自應詳  
輯越乾隆元年書成



四川通志四十七卷

總督四川兵部右侍郎兼都察院右副都御史黃  
廷桂等監修

臣等謹按舊志在明凡四修我

朝康熙十二年總督蔡毓榮巡撫張德地又續纂  
輯是編乃雍正七年遵

旨重修十一年書成

廣東通志六十四卷

巡撫廣東兵部右侍郎兼都察院右副都御史郝  
玉麟等監修

臣等謹按嶺南輿地自漢魏以至明代記載甚多  
然皆不能詳備至

聖祖仁皇帝二十二年始纂成通志雍正七年復遵

旨重修而撫臣郝玉麟鄂彌達等踵相採輯乃稱該備九  
年書成

廣西通志一百二十八卷

巡撫廣西都察院右副都御史金鉷等監修

臣等謹按自史記有桂林象郡之名而粵西輿志  
乃代有作者然而古今之形勢既殊則建置之更  
張不一雍正七年

命修通志于是督臣鄂爾泰遵

旨纂輯歷高其倬尹繼善以至撫臣金鉷相續編輯十一  
年書成

雲南通志三十卷

大學士鄂爾泰等監修

臣等謹按滇中地志實昉于唐明藝文志載洪武既平雲南諸儒臣定為志書六十一卷今已無存

本朝康熙三十年始復輯為成書雍正七年遵

旨重修時鄂爾泰總督雲貴因舊志而增損之繼其事者為督臣高其倬尹繼善撫臣張允隨等分為三十卷乾隆元年書成

貴州通志四十六卷

大學士鄂爾泰等監修

臣等謹按貴州為西南僻壤故凡紀載之書自唐宋以前未聞作者明趙瓚始創為新志而謝東山郭子章輩踵而修之

國朝康熙初巡撫曹申吉重加釐訂為書三十三卷  
雍正七年遵

旨重修較他省通志最後成凡經督臣鄂爾泰尹繼善張

允隨張廣泗撫臣元展成諸人之手而始告竣增  
為四十六卷乾隆六年書成

歷代帝王宅京紀二十卷

顧炎武撰炎武見經類

臣等謹按是書考歷代帝王所都斷自黃帝終於  
故明其偏安者各按時代附焉

海昌外志

無卷  
數

談遷撰遷字孺木一字仲木海寧人

西寧志七卷

蘇銑撰銑交河人順治丙戌進士官至廣東道

續安邱志二十五卷

王訓撰訓字敷彝安邱人順治丁亥進士官萬全

縣知縣

永平府志二十四卷

宋琬撰琬字玉叔號荔裳萊陽人順治丁亥進士

官至四川按察使

杞紀二十二卷

張貞撰貞字起元號杞園安邱人康熙壬子拔貢  
官翰林院孔目

貞自序曰貞族世居濰河東岸莊號高柯實在杞  
子故域貞涉獵史傳見其有關於杞者悉掌記之  
積紙篋衍漫不省錄忽忽十年丙戌夏偶有所觸  
因憶前事從煙煤蟲篆中檢付兒子在辛釐為二  
十二卷曰圖考曰星土曰輿地曰山川曰繫年曰



沿革曰封建曰年表曰世次曰原古曰分國曰系  
家曰苗裔曰春秋經傳曰經傳別解曰人物曰遺  
書曰藝林曰雜綴所引書四百有餘種

蕭山縣志刊誤三卷 杭志三詰三誤辨一卷

毛奇齡撰奇齡見經類

臺灣紀略一卷

林謙光撰謙光字芝楣長樂人

臣等謹按

國初明臣鄭克塽竊據臺灣負固梗化康熙二十三年始克平定諫光因作是編分十三篇末附以澎湖之志因初經開闢草創未就故名為紀略而不稱志焉

登封縣志十卷

張聖誥撰聖誥字紫書號韋菴廣寧人官登封縣知縣

琅鹽井志四卷

沈鼎撰鼎字枚臣長洲人由貢生官雲南琅鹽井  
鹽課提舉

師宗州志二卷

管掄撰掄武進人官師宗州知州

遼載前集二卷

林本裕撰本裕字益長奉天人

本裕自序曰是編折衷於

盛京志其前集則仿龍門志乘後集則仿涑水編年

揚州府志四十卷

張萬壽撰萬壽字鶴秋浮山人官至揚州府知府

河套志六卷

陳履中撰履中字執夫商邱人官至分巡寧夏兵

備道

澳門紀略二卷

印光任張汝霖同撰光任字散昌寶山人官至太

平府知府汝霖字雲墅宣城人由拔貢生官至澳

門同知

右地理類都會郡縣

欽定河源紀略三十六卷

乾隆四十七年

皇六子永瑤

皇八子永璇

皇十一子永理大學士公阿桂等奉

敕撰

皇上御製河源簡明語曰予既為河源詩並按語既讀  
宋史河渠志有文命輯河源紀略有諭茲以體大物  
博考今證古不無費辭雖彼此細勘事則明恐毫釐  
稍差義乃紊茲為簡明之語庶因提要而便覽蓋河  
源究以張騫所探蒲昌海鹽澤及漢武所定昆侖為  
是雖山海經水經注皆畧具其說山海經劉歆稱伯  
益所著本無所據水經注則桑欽酈道元皆張騫後  
人實祖其說而廣之以至於煩文且昆侖在回部原

出玉也獨未明揭伏流至青海於阿勒坦噶達素之  
天池而出耳歷唐宋以至元乃有鄂敦淖爾為河源  
之語鄂敦為蒙古語漢語即星宿海也彼時雖未考  
至天池而中國之河源實由此頗見梗概矣溯伏流  
以至蒲昌海鹽澤非河源而何星宿海亦鹽澤之伏  
流至青海而出為清水黃河挾之以流始為微淡後  
為純黃是二水本一源至中國出地為二色而終歸  
于一若夫曲折纖細則見近所為詩文及紀略之書

獨叙其簡明崖略如此

臣等謹按是年春有事豫工

上命侍衛阿彌達祭告西寧河神因西溯河源繪圖具奏言星宿海西南三百餘里有阿勒坦郭勒水色獨黃又西有阿勒坦噶達素齊老流泉百道入阿勒坦郭勒是為黃河真源為自古探索所未及

皇上因考徵實驗叅訂舊文

御製河源詩一章並讀宋史河渠志一篇闡河出崑崙



之實古今譌誤曠若發蒙復

命諸臣綜覽史文旁稽字說撰定是編綜為一書首卷

冠以

御製詩文次曰圖說三卷曰列表五卷曰質實五卷曰

證古六卷曰辨偽六卷曰紀事六卷曰雜錄四卷

由是河源脈絡摹繪精詳一展卷而瞭如指掌蓋

由

帝德廣運無遠弗周是以星使宣勞奉職克稱數百年

沿謫襲謬始得真源豈張騫篤什之流粗陳梗概者所可同日語哉

河紀二卷

孫承澤撰承澤見經類

承澤自跋曰此非如史家河渠蓋漕政也漕之通塞視乎河河安則漕安河變則漕危重漕故重河所紀者治之人治之事治之言

具區志十六卷

翁澍撰澍字季霖吳縣人

兩河清彙八卷

薛鳳祚撰鳳祚見經類

北河續記八卷

閻廷謨撰廷謨孟津人順治丙戌進士官工部主  
事

河防芻議六卷

崔維雅撰維雅新安人順治丙戌舉人官至布政

使

治水要議一卷

孫宗彝撰宗彝見經類

新劉河志一卷婁江志二卷

顧士璉撰士璉字殷仲太倉州人

今水經一卷

黃宗羲撰宗羲見經類

山東全河備考四卷

葉方恒撰方恒字學亭崑山人順治戊戌進士官至山東濟寧道

水經註集釋訂訛四十卷

沈炳吳撰炳吳字繹旃歸安人

臣等謹按酈道元水經一書傳寫既久輾轉沿訛炳吳乃博取各史志中異同之詞及諸家考訂之說據明嘉靖中黃省曾所刊注本詳加校定歷九年而成是書其用心亦良苦矣

水經注釋四十卷刊誤十二卷

趙一清撰一清字誠夫仁和人

全祖望述曰余嘗得先世舊聞謂道元水經注中有注本雙行夾寫今混作大字幾不可辨

明江南治水記一卷

陳士鑛撰士鑛號宿峯秀水人康熙初以貢生閣試授主事

湘湖水利志三卷

毛奇齡撰奇齡見經類

崑崙河源考一卷

明代河渠考

無卷數

萬斯同撰斯同見經類

東南水利八卷

沈愷曾撰愷曾歸安人康熙壬戌進士官至山東

道監察御史

居濟一得八卷

張伯行撰伯行見經類

臣等謹按是編乃伯行為河道總督時相度形勢錄之以備參考於諸水利病條分縷析疏證頗詳切於實用

治河奏績書四卷

靳輔撰輔見奏議類

張大有序曰輔開白洋清河以東引河水開清爛泥淺諸引河開雲梯闢出海故道築周橋六壩堤工置減水壩濬中河以避黃河之險改挑阜河以



避駱馬湖之淤墊皆其仰遵

廟算悉心籌畫者也

臣等謹按輔遭逢

聖祖仁皇帝平成天地故能于隄防規畫言所欲言凡所  
入告俱蒙

俞旨其論築堤岸疏下流塞決口有先後而無緩急具見  
綱領十六年間三膺總河之任成勞懋著迄今究  
豫之間猶馨香弗替云

直隸河渠志一卷

陳儀撰儀字子覲號一吾文安人康熙乙未進士官至翰林院侍講學士充壩州等處營田觀察使行水金鑑一百七十五卷

傅澤洪撰澤洪字穉君鑲紅旗漢軍人官至分巡淮揚道按察副使

澤洪自序曰四瀆古運河也沿江達淮亂河浮濟禹貢具載之矣今之運河用以轉荆揚諸州數十

百萬之糧於京師不猶古之江淮河濟哉四瀆治  
運河亦治相因之勢也顧黃河湍悍為中州病淮  
水渟蓄為高堰危黃強淮弱為清口梗山左泉涸  
水匱濟汶諸水俱不足以濟運而運河淺阻澤洪  
為水官二十年用是遠稽經史近述

訓旨凡四瀆運河興廢之由及疏築塞防之宜皆備載焉  
首繪圖次河淮漢江濟運河次兩河總說次官司  
次夫役次河道錢糧次隄河彙考次牆壩涵洞彙

考次漕規次漕運

太湖備考十六卷

金友理撰友理字玉相吳縣人

水道提綱二十八卷

齊召南撰召南字次風台州人乾隆丙辰

召試博學鴻詞授翰林院編修官至禮部侍郎

治河前策二卷後策二卷

馮祚泰撰祚泰字粹中滁州人乾隆壬申舉人

水鑑六卷

郭起元撰起元閩縣人官至宿虹同知

安瀾文獻一卷

沈光曾撰光曾秀水人官高郵州知州

光曾自序曰潘季馴稱河不兩行乃泐河未創中  
河未開以前以黃河為運道故有是說今則運道  
自清河桃源以上已無藉於黃自宜隨時籌畫  
海塘錄二十六卷

瞿均廉撰均廉見經類

右地理類河渠

海防述略一卷

杜臻撰臻見傳記類

臣等謹按康熙二十二年臻奉

詔往閩粵定疆理目擊沿海險要及往來策應諸形勢乃

作是編其于海防事宜言之甚鑿鑿可據

延綏鎮志六卷

譚吉璉撰吉璉字丹石嘉興人由內閣中書官至  
登州府知府

蠻司合志十五卷

毛奇齡撰奇齡見經類

奇齡自序曰蠻司踞湖廣貴州四川雲南廣東廣  
西六省曰狔曰玃曰獠曰獯凡數十種歷代各有  
大姓為領袖明踵元舊事遍設官吏盡布籍屬凡  
土官名號曰宣慰司曰招討司曰安撫司曰長官

司初皆隸吏部驗封而後以土兵相制半隸武選  
每襲替必奉朝命其無子弟者即妻女皆得襲替  
嘉靖九年令該府州縣正貳經歷巡檢驛傳三百  
六十隸驗封宣慰招討安撫長官一百三十三隸  
武選隸驗封者布政司領之隸武選者都指揮使  
司領之故自洪武暨崇禎一十六朝二百七十餘  
年之間凡沿革向背大征大役或得或失稍見史  
乘者畧輯其大凡彙為一編



江防總論一卷 海防總論一卷

姜宸英撰宸英字西溟慈谿人康熙丁丑進士官

翰林院編修

秦邊紀略四卷

不著撰人名氏

右地理類邊防

皇朝文獻通考卷二百二十三

欽定四庫全書

皇朝文獻通考卷二百二十四

經籍考 十四

史 地理 時令 譜牒 目錄

御定清涼山新志十卷

聖祖仁皇帝御製序曰朕惟清涼山古稱文殊大士演教之區也茲山聳峙於雁門雲中之表接恒岳而俯潯沱橫臨朔塞藩屏京畿其地風勁而高寒層氷結於陰巖

積雪留於炎夏故名清涼然地雖寒而嘉木芳草蒙茸  
山谷稱靈異焉五峯竦立上矗霄漢日月之所迴環烟  
霞之所虧蔽蒼然深秀其爲神臯奧區蓋自昔而已然  
矣是以自漢至今歷代皆有崇建古刹精藍遍滿巖岫  
宇內稱靈山佛土最著者有三峨嵋普陀而五臺爲尤  
盛焉我

世祖章皇帝上爲

慈闈祝釐下爲蒼生錫福賜金遣使屢沛恩施朕數經駐

蹕茲山爲

兩宮祈康寧福祉因而登五峯陟臺懷各爲文勒石以紀之琪樹靈葩形於篇咏蓋嘗念佛教以清淨慈惠爲本以戒定智慧爲宗亦有裨於勸善遠惡茲山又密邇塞垣遠離塵俗當爲清修者之所棲泊故於此每惓惓焉山之有志所以紀形勝述建置載藝文俾後之人有所稽考往蹟舊聞不致淹沒茲編詳簡適中不蕪不支清涼勝境可撫卷而得其梗概也因叙於簡端

臣等謹按舊志成於順治十八年至康熙三十年奉

敕重修凡分十類並

御製序文并諸卷首焉

欽定盤山志二十一卷

乾隆十九年協辦大學士戶部尚書蔣溥等奉

敕撰

皇上御製序曰向於雍正年間奉

命敬謁

景陵往來薊野田盤山色宜人蓋蓄於目且沃於心矣而以程期惟謹訖未登臨因索智朴誌書讀之嗤其意求博而辭失冗夫耕問僕織問婢山經地志文士之事彼方外流拘名象而濫硃硃者何爲哉踐阼以後勅幾勤政日不暇給閱七年而後一往遊焉及一遊則峰之秀泉之清松之蒼石之詭日往來於吾懷是猶未見君子怒如調饑亦既見止我心則夷矣嗣是

規地建園施金葺寺蹟之廢者日以舉境之幽者日以出上

陵回鑾每憇止焉夫山川顯晦時有定數而必待人以彰不數年之間使田盤改觀者余也而顧茲寰宇風未臻乎唐虞歲未餘乎三九慙然抱愧者亦余也誌盤山而請序者其亦同余此心也耶

臣等謹按乾隆十九年二月

命溥等纂修新志因詳加裒訂輯成是編茲山林巒幽



邃秀甲畿東在漢爲田疇隱居之地伏遇我

聖祖仁皇帝鑒輅巡臨大開神秀我

皇上展謁

祖陵

翠華駐蹕特建

山莊以供靜憩由是輝煌金碧靈境日開宜其偕嶽

鎮以效靈永備

宸遊於無極矣

西湖志四十八卷

李衛纂衛字又玠銅山人官至直隸總督諡敏達  
西湖志纂十二卷

乾隆十六年大學士梁詩正等恭纂

臣等謹按乾隆十六年

聖駕南巡詩正請重修西湖志會尚書沈德潛取雍正  
中李衛等所輯舊志重加刪訂繕錄恭進得

旨嘉獎並

詔詩正即取李衛本刪併爲一乃復參考釐定別類分  
門首名勝各圖次西湖水利次孤山南山北山吳  
山西溪諸勝蹟次藝文凡十二卷門目雖減於舊  
志紀載已綜夫大綱

天翰親題湖山生色夫是以炳朗乎寰區爭芳乎嶽瀆  
豈僅以幽巖絕壑擅東南山水之最也哉

太平三書十二卷

張萬選編萬選字舉之濟南人官太平府推官

乍浦九山補志十二卷

李確撰確見雜史類

昌平山水記二卷

顧炎武撰炎武見經類

四明山志九卷

黃宗羲撰宗羲見經類

宗羲自序畧曰壬午歲余作四明志亡友陸文虎欲刻之而未果癸丑歲盡偶展此卷文虎評校之

朱墨如初脫手然其間凡例不齊詞不雅馴重爲竄改始得成書

黃山志七卷

閔麟嗣撰麟嗣字賓連歙縣人

麻姑山丹霞洞天志十七卷

羅森撰森字約齋大興人順治丁亥進士官至陝

西督糧道

峨眉山志十八卷

蔣超撰超字虎臣金壇人順治丁亥進士官翰林

院編修

嵇眉志畧一卷

張能鱗撰能鱗見經類

浯溪考二卷 長白山錄一卷 補遺一卷

王士禎撰士禎見傳記類

士禎自序浯溪考曰楚山水之勝首瀟湘瀟湘之

勝首浯溪浯溪以唐元結次山名得魯公磨厓書

而益張之舊有浯溪前後兩集爲李仁剛綦光祖  
撰見於輿地志碑目皆無傳今志乃出庸手冗雜  
泛濫至不可耐乃以退食之暇窮搜遐撫要取精  
覈間錄詩賦雜文多郡志溪志所未收者

鼓山志十二卷

僧元賢撰

恒岳志三卷

張崇德撰崇德字懋修順天人官渾源州知州

七星巖志十六卷

韓作棟撰作棟字公吉鑲藍旗漢軍人順治中官  
按察司僉事

臣等謹按此志本明王泮所作名曰定山石室志  
蓋七星巖一名崧臺又名定山故也作棟因泮書  
重加修纂而吳綺又爲之潤色焉

幾眉山志十八卷

曹熙衡撰熙衡字素微錦州人順治中官至貴州



按察使

龍唐山志五卷

僧性制撰

臣等謹按浙江通志本作龍塘而此作龍唐者蓋猶錢塘之可作錢唐也故書中如唐井等字亦盡不加土旁以昭畫一

寶華山志十卷

釋德基撰

廬山通志十二卷

釋定暉撰

西湖夢尋五卷

張岱撰岱字陶菴自號蝶菴居士會稽人僑寓錢塘

百城烟水九卷

徐崧撰大純同撰崧吳江人大純長洲人

尤侗序曰崧有詩名好遊佳山水間嘗綴集吳地

古蹟爲此書其友張大純助其捃摭未畢而崧歿  
大純因重加纂輯刊行

蟬磯山志二卷

柯願撰願字又鄒龍溪人康熙甲辰進士官主事  
嶽麓志八卷

趙寧撰寧字又裔山陰人官長沙府同知

說嵩三十二卷 嵩嶽廟史十卷

景日珍撰日珍字東陽登封人康熙辛未進士官

至戶部侍郎

日珍自序說嵩畧曰主山爲幹附見爲支曰嵩高  
曰太室曰太室上曰太室陰曰太室麓曰太室原  
曰少室上曰少室東曰少室南曰少室陰曰箕山  
爲是書之經曰星野曰沿革曰形勢曰水泉曰封  
域曰游記曰古蹟曰金石曰傳人曰物產曰二氏  
曰撫異曰藝林曰風什爲是書之緯

嵩嶽廟史例畧曰漢武之登封孝明之巡幸胡后

武壘之離宮別院事涉游盤無闕秩祀概從刪削  
鷄足山志十卷

范承勳撰承勳鑲黃旗漢軍人官至雲南總督  
普陀山志十五卷

朱謹陳璿同撰謹見經類璿始末未詳

湘山志八卷

徐泌撰泌字鶴汀衢州人康熙中官全州知州

林屋民風十二卷

王維德撰維德字洪緒吳縣人

廬山志十五卷

毛德琦撰德琦字心齋鄞縣人由貢生官星子縣知縣

德琦自序畧曰山川分紀多仍其舊文翰則隨時而增書之

玉華洞志六卷

陳文在撰文在字新我將樂人

羅浮山志十二卷

陶敬益撰敬益江寧人康熙中官博羅縣知縣

羅浮山志會編二十二卷

宋廣業撰廣業字澄溪長洲人康熙中官至山東

濟東道

羅浮外史

無卷數

錢以塏撰以塏字蔗山嘉善人康熙戊辰進士官

至太子少保禮部尚書諡恭恪

惠陽山水紀勝四卷

吳騫撰騫字益存號樂園當塗人康熙辛未進士官至惠州府知府

臣等謹按是編雖總名惠陽山水而其實止紀羅浮西湖兩地故如霍山龍川等並爲惠州之名勝而志皆不及焉

西樵志六卷

馬符錄撰符錄字受之南海人官陸豐縣訓導



武夷九曲志十六卷

王復禮撰復禮見經類

太嶽太和山紀畧八卷

王概撰概字成木諸城人雍正癸丑進士官至兩

廣鹽運使

峽石山水志一卷

蔣宏任撰宏任字擔斯海寧人

雁山圖志

無卷數

僧實行撰實行字奕庵山陰林氏子居雁山能仁寺

金井志四卷

姜虬綠撰虬綠字秋島烏程人自號蒼弁山人又號大海樵人

虬綠自序曰住山以來日有記錄并見古人詩歌雜識手輒鈔摘凡分山谷文獻金石藝文四門

泰山道里記一卷

聶鉸撰鉸字劍光泰安人

鉸自序曰生長泰山下少爲府胥性嗜山水每攀  
幽躋險探稽往躅因讀劉其旋泰山紀畧成城泰  
山勝概其中有一地兩稱或名同地異巖谷深阻  
題刻爲苔蘚所蔽者間遺而未錄近乃架梯刮磨  
垢蝕而求之雖風雨寒暑勿憚其勞又質之野老  
參考羣書竭半生精力彙成一編提挈道里爲綱  
領分之爲五合之爲一曰泰山道里記

敘從孫學文識曰余從祖蒐討金石之文閱二十  
餘年凡諸紀載所未詳者如石經峪刻金剛經據  
徂徠刻石辨爲北齊王冠軍書唐紀泰山銘下截  
剝落葉彬補書百八字宋述功德銘磨勒岱巔鐫  
毀原碑字猶存介邱巖分水谿及古明堂均失覈  
蓄疑又肅然山奉高城季札之墓與白驪冢俱誤  
指其地汶津三谿諸水皆牽混源流岱背琨瑞靈  
巖諸山因隸他縣而未錄併逐加考驗以辨訛補

闕焉

峽川志一卷

潘廷章撰廷章字梅巖自稱海峽樵人海寧人

西湖覽勝志十四卷

夏基撰基字樂只杭州人

南湖紀畧稿六卷

邱俊撰俊見政書類

臣等謹按南湖一名白洋池在杭州城北隅宋張

俊賜第四世孫鎡別業據湖之北因名南湖楊萬里陸游諸人皆爲題詠而鎡亦以自名其集遂傳爲古蹟俊少居其地因采輯宋時志乘及說部文集勒成此志

右地理類山水

江城名蹟五卷

陳宏緒撰宏緒字士業新建人

臣等謹按宏緒自序曰古與今不以時代爲斷而

一以興廢存亡爲斷蓋是書上卷考古下卷證今  
故其言如此

營平二州地名記一卷

顧炎武撰炎武見經類

金鼇退食筆記二卷

高士奇撰士奇見經類

士奇自序曰自丁巳

賜居太液池之西朝夕策馬過金鼇玉竦橋望苑中景物

七閱寒暑退食之頃偶訪曩時舊制約畧得之傳聞又彷彿尋其故址離宮別館廢者多矣脫復不加訂證無以昭我

皇上卑宮室約園囿之儉德因率筆記之詳於西而畧於東以所居在苑西故也紀其興廢而復雜以時事欲見

昭代之盛存爲太平嘉話也又曰衙署監局載在會典者不書訪聞未確者不書外人所罕窺者亦不敢



書

石柱記箋釋五卷

鄭元慶撰元慶字芷畦歸安人

朱彝尊序曰湖州石柱歐陽永叔謂非顏魯公不能書孫莘老知湖州聚境內碑碣築墨妙亭貯之記其一也所記山川陵墓廟石旁及屏風竹帳雉尾扇顧唐五縣而記遺其二元慶成箋釋四卷彝尊爲補其遺

靈隱寺志八卷

孫治撰徐增重編治字宇台仁和人增字子能吳

縣人

滄浪小志二卷

宋犖撰犖字牧仲號漫堂商邱人由廕生官至吏

部尚書

杏花村志十二卷

郎遂撰遂字趙客號西樵子池州人

二樓小志四卷

程元愈撰汪越沈廷璐補葺元愈字偕柳越字師退廷璐字元佩皆寧國人

臣等謹按寧國府有南北二樓其北樓即晉謝眺之高齋其南樓乃明嘉靖間知府朱大器所建之文昌臺也後佟賦偉嘗作二樓記畧不專言二樓之事元愈等乃取歷代題詠之詞彙爲是編

青原志畧十三卷

僧大然撰施閨章補輯大然始末未詳閨章字尚  
白號愚山宣城人順治己丑進士官至江西布政  
司參議康熙己未

召試博學鴻詞授翰林院侍讀

崇恩志畧七卷

僧智藏撰智藏字竺堂安福人

江心志十二卷

釋元奇撰始末未詳

臣等謹按江心寺之建其來甚久考謝靈運詩已有亂流趨正急孤嶼媚中川之語矣寺在永嘉江中古稱名蹟特未有紀其勝者其後郡人王暘谷始創爲志元奇特重加校訂而成是編

白鹿書院志十六卷

廖文英撰文英見經類

靈谷寺志十六卷

吳雲撰雲號舫翁安福人

白鹿書院志十九卷

毛德琦撰德琦見山水類

通元觀志二卷

吳陳琰撰陳琰見經類

孔宅志六卷

諸紹禹撰紹禹松江人

臣等謹按孔宅在青浦縣之北世傳孔子三十四代裔孫名禎者於隋末爲蘇州刺史遂僑寓於吳

立家廟塋先聖衣冠於此後廟漸湮廢明陸應陽  
復爲修治採閭閻說作孔廟記陳功又作續記康  
熙中紹禹取舊本刪輯成編然先聖衣冠之說終  
不免爲無稽之談耳

丹霞洞天志十七卷

蕭韶撰韶字明彛南城人康熙中舉人

武林志餘三十二卷

張暘撰暘字東搏號滌岑錢塘人

東林書院志二十二卷

高桂高隆高廷珍高陞許獻同撰桂等四人皆高攀龍裔獻亦同縣人也

增修雲林寺志八卷

厲鶚撰鶚見正史類

臣等謹按雲林寺本名靈隱

聖祖仁皇帝巡幸江浙時

特賜今額鶚以志書不應仍用舊名乃因前志易其名而



增輯之

宋東京考二十卷

周城撰城號石匏嘉興人

王珪序曰城客大梁三載隨境討蒐以成此書

蘄湖講學會編十二卷

鄭之僑撰之僑字東里潮陽人乾隆丁巳進士官

至寶慶府知府

關中勝蹟圖志三十二卷

陝西巡撫畢沅撰

臣等謹按是書以郡邑爲經以地理名山大川古蹟爲緯附圖於後會萃古今記載如三輔黃圖以下及山水游記州郡志乘諸書無不採取訂舛釐訛使之歸於畫一蓋沅當行部之時涉歷川原親爲詢求古蹟考古證今因成是編故凡名勝之區無不詳其始末云

右地理類古蹟

顏山雜記四卷

孫廷銓撰廷銓見傳記類

王士禎序曰田雯黔書七十六篇有似爾雅者有似考工記者有似公穀檀弓者有似越絕書者孫文定公作顏山雜記文筆奇峭亦如此

天府廣記四十四卷

孫承澤撰承澤見經類

山東考古錄一卷 京東考古錄一卷 譎觚十

事一卷

顧炎武撰炎武見經類

四州文獻摘鈔四卷

畢振姬撰振姬字亮四高平人順治丙戌進士官

至廣西按察使

司昌齡跋曰四州文獻蓋潞澤遼沁之通考也其間有懸揣附會之說前無總序倫類紛雜蓋草創未就而其徒所鈔次凡二十五冊余以前人舊文

各有原書又繁不能盡錄乃節其論著之要者與其所纂物產釐爲四卷題曰四州文獻摘鈔云

甌江逸志一卷

勞大輿撰大輿字宜齋石門人順治辛卯舉人官

永嘉縣教諭

嶺南風物紀一卷

吳綺撰宋俊增補江閩刪訂綺字園次號聽翁江都人順治甲午拔貢生官至湖州府知府俊字長

白山陰人闡字辰六桂陽人

粵述一卷

閔叙撰叙號鶴臞縣人順治乙未進士官至監

察御史

星餘筆記一卷

王鉞撰鉞見傳記類

中州雜俎三十五卷

汪价撰价字介人號三農外史自稱吳人里居未

詳

臣等謹按順治己亥河南巡撫賈漢復修通志時  
介嘗與其役因採古來遺事涉及中州者彙爲是  
書仿類書之例分天地人物四門而各係以子目  
然所採多取諸稗官野史近於小說之體矣

湖壩雜記一卷

陸次雲撰次雲字雲士錢塘人康熙初由拔貢生

官江陰縣知縣

姑孰備考八卷

夏之符撰之符字珏伯當塗人

臺灣記畧一卷

李麟光撰麟光號蓉洲武進人

海表奇觀八卷

不著撰人名氏自序題康熙戊申嘗官瓊州

江南星野辨一卷

葉燮撰燮字星期吳江人康熙庚戌進士官寶應



縣知縣

嶺南雜記二卷

吳震方撰震方見經類

臺灣隨筆一卷

徐懷祖撰懷祖字燕公松江人

燕臺筆錄一卷

項惟貞撰惟貞字端伯秀水人

神州古史考一百五十卷 方輿通俗文一卷

倪璠撰璠字魯玉錢塘人康熙乙酉舉人官內閣  
中書

璠自序曰按今之版圖取自漢迄唐諸史地志列  
於郡縣之首上搜舊聞旁撫遺逸凡兩京十四省  
共一百五十餘卷謂之神州古史考又取唐以後  
者別爲一編名曰方輿通俗文

臺海使槎錄八卷

黃叔璥撰叔璥見職官類

西粵對問

無卷數

江德中撰德中字漢石徽州人官至廣西布政司

叅議

龍沙紀畧一卷

方式濟撰式濟字屋源號沃園康熙己丑進士官

中書舍人

潯陽蹠醢六卷

文行遠撰行遠字樵菴江西德化人康熙中貢生

例畧曰讀書時遇郡事隨見隨錄自經史子集及  
稗官野乘小說之類靡所不採

蜀都碎事六卷

陳祥裔撰祥裔本姓喬氏號藕漁順天人康熙中  
官成都府通判

續閩小紀一卷

黎定國撰定國字于一江都人

嶺海見聞四卷

錢以壇撰以壇見山水類

東城雜記二卷

厲鶚撰鶚見正史類

南漳子二卷

孫之騷撰之騷見經類

右地理類雜記

廣州遊覽小志一卷

王士禎撰士禎見總錄類

臣等謹按士禎自述年譜曰康熙甲子十一月奉命祭告南海乙丑二月十日抵廣州入南海神廟蒞事四月一日發廣州蓋其在廣州留連者五十一日以其暇遊覽諸名勝因作是編焉

天下名山記鈔

無卷數

吳秋士撰秋士字西湄歙縣人

泰山紀勝一卷

孔貞瑄撰貞瑄見經類

匡廬紀遊一卷

吳闡思撰闡思字道賢武進人

滇黔紀遊二卷

陳鼎撰鼎見總錄類

玉山遺響六卷

張貞生撰貞生號簞山廬陵人順治戊戌進士官

至翰林院侍讀學士

羅麗序畧曰貞生所著文集尚未刊行此其家居

一載之內流連山水隨筆記之以示其意之所寓  
者

蒼洱小記一卷

畢曰濤撰曰濤見傳記類

右地理類遊記

安南使事紀一卷

李仙根撰仙根字南津遂寧人順治辛丑進士第

二官至戶部侍郎



坤輿圖說二卷

南懷仁撰懷仁西洋人康熙中官欽天監監正

臣等謹按是書爲上下兩卷上卷分十五條自坤輿至人物皆言地之所生下卷分五大州載海外諸國附以西洋七奇圖說與艾儒畧職方外紀互有詳畧雖所記不無粉飾而要以外國人記外國事或不盡虛謬耳

西方要記一卷

利類思安文思南懷仁等撰類思等皆西洋人  
洱海叢談一卷

釋同揆撰同揆字輪菴雲南大理府文殊寺僧  
使琉球記一卷

張學禮撰學禮字立菴鑲藍旗漢軍人官廣西道  
監察御史巡視河東鹽政

臣等謹按康熙元年琉球國王尚質繳故明敕印  
舉國內附學禮以兵科副理事官偕行人司行人

王垓奉

詔冊封此其紀請封遣使始末及往來途路之險阻未附

中山紀畧載其土風民物足備採陳

八紘繹史四卷 紀餘四卷 八紘荒史一卷

崙谿織志三卷 志餘一卷

陸次雲撰次雲見雜記類

次雲自序崙谿織志曰諸書所載同異攸殊余徵諸見聞詳爲考正措詞雖簡徵事彌該

安南紀遊一卷

潘鼎珪撰鼎珪字子登晉江人

海外紀事六卷

釋大汕撰大汕廣東長壽寺僧

連陽八排風土記八卷

李來章撰來章號禮山本名灼然以字行襄城人

康熙乙卯舉人官連山縣知縣

異域錄一卷

圖理琛撰圖理琛姓阿顏覺羅氏先世葉赫人由  
考取內閣中書官至兵部郎中

中山沿革志二卷

汪楫撰楫字舟次休寧人康熙己未

召試博學鴻詞授翰林院檢討

楫自述曰奉

使諭祭故王入其祖廟因密錄其神主又得琉球世續圖  
參以明代實錄約畧詮次輯成是編

中山傳信錄六卷

徐葆光撰葆光字澄齋吳江人康熙壬辰進士官翰林院編修

臣等謹按康熙五十七年葆光副海寶使琉球成書奏

御繪圖系說紀述頗稱詳洽

楚南苗志六卷

段汝霖撰汝霖字時齋號梅亭漢陽人由舉人歷

官建寧府知府

海國見聞錄二卷

陳倫炯撰倫炯字資齊同安人官至浙江寧波水師提督

琉球國志畧十六卷

周煌撰煌字海山涪州人乾隆丁巳進士官至兵部尚書諡文恭

臣等謹按煌於乾隆二十二年奉

命敕封琉球纂輯志畧別類分門徵信紀實仰蒙  
睿鑒排版行世洵儒臣稽古之榮也

右地理類外紀

欽定月令輯要二十四卷圖說一卷

康熙五十四年

聖祖仁皇帝御定

聖祖仁皇帝御製序曰古者於明堂之中施十二月之令  
本堯典授時之意而推廣之今所傳大戴禮夏小正篇



小戴禮月令篇三代之遺文大畧可見矣月令雖出呂覽而蔡邕次其章句孔穎達定其正義推明周公品制列之於經漢晉而下若四民月令四時纂要以及千金錦帶歲華紀麗歲時雜記諸書代有撰述未睹賅備前明之季馮應京戴任始輯月令廣義二十四卷爲士庶通用觀其原本經訓推衍義類用意亦云勤矣顧其采撫既多蕪累間出爰命儒臣重加編輯次第呈覽親爲裁定正譌芟複一歸雅馴別起義例補所未備博觀約

取務合於體要而切於實用庶幾古者明堂月令之遺式矣書成名曰月令輯要舊本圖說并爲釐正列諸卷端因天時而課治功察物候以盡人事自國家政典下逮眊庶作息均可參驗而閱覽博物之學亦於是乎有取焉由今而後言紀時之書者其必以此爲權輿也夫

古今類纂歲時部四卷

董穀士董炳文同編穀士字農山炳文字霞山烏

程人

潘耒序曰穀士兄弟共撰類書分天地人物爲四部名曰古今類傳先以歲時日次一編見示乃天部中之一種自元旦至歲除徵綴條繫無有缺者其蒐採致爲繁富

節序同風錄

無卷數

孔尚任撰尚任見傳記類

臣等謹按是書以十二月爲綱以節令爲目各紀其風俗事宜於下蓋仿荆楚歲時記例也

時令彙紀十六卷 餘日事文四卷

朱濂編濂爵里未詳

右時令

欽定八旗滿洲氏族通譜八十卷

乾隆九年大學士鄂爾泰等奉

敕撰

皇上御製序曰我

祖宗誕膺

天命勃興東土德綏威讐奄旬萬姓維時龍從鳳附之衆  
雲合嚮應輻輳鱗集强者率屬歸誠弱者舉族內附  
我

祖宗建師設長以涖之分旗隸屬以別之厥有熊羆之士  
不二心之臣効命疆場建謀帷幄親以肺腑重以婚  
媾酬以爵命迨入關定鼎或聚居遼左或散處燕畿  
錫之土田爰及苗裔至於今百五十年生聚蕃衍  
時萬時億

累朝休養煦植鞠保胥勤越我嘉師咸能永世以滋大朕

惟

祖宗德澤之深不可不繼修令緒益縣延惇固於無疆重  
慮物阜且博代序日遠族姓日繁不爲之明章統系  
俾知世德所自將罔克念先人之勤無以光昭前列  
爰發金匱石室之藏徵載籍稽圖譜考其入我朝來  
得姓所始表之以地系之以名官階勲績綴爲小傳  
勲舊戚畹以及庶姓釐然備具秩然有條與國史相

爲表裏昔周小史定繫世辨昭穆左氏內外傳言天子建德因生賜姓胙土命氏而司商吹律以定姓名蓋萬物本乎天人本乎祖木有根而枝附焉水有源而流出焉譜牒者所以聯人情之渙而維舊俗之漓不可忽也相昔先民遺風敦樸不徒以俗望相高是書之作非如魏晉隋唐譜牒之學炫博聞而廣附會以膏粱閥閱爲尚也書曰古我先王暨乃祖乃父胥及逸勤又曰惟乃祖乃父世篤忠貞服勞王家纘乃

舊服無忝祖考前之人既以忠實勤勞覆幬其後嗣  
凡茲食舊德而服先疇者其何以無隳厥緒書亦曰  
率乃祖考之攸行昭乃辟之有又是則朕所厚望也  
夫

臣等謹按是書詳載滿洲氏族源流以姓氏爲綱  
地名人名爲目姓氏下總書地名地名下總叙得  
姓之由及支分派別人名下撮其官階事實爲傳  
其蒙古高麗尼堪等之久隸八旗者亦併錄焉仰



見

開國之初八旗部屬枝幹相維什伍相保聯比閭族黨之情膺腹心干城之寄故其間勲勞懋著節義昭垂雲龍風虎之遭逢蔚爲名世之佐者有非偶然者矣

歷朝人物氏族會編十卷

舊題禾川南里松山逸叟穎侯氏撰不著姓氏

希姓補五卷

單隆周撰隆周字昌其蕭山人

臣等謹按明夏樹芳以楊慎所輯希姓二卷紀錄未備因分韻編次爲奇姓通十四卷隆周復爲補楊氏之缺畧然亦但就所見錄之究未能無遺憾耳

顧氏譜系考一卷

顧炎武撰炎武見經類

姓氏譜六卷 李氏類纂五十卷

李繩遠撰繩遠字斯年嘉興人

氏族箋釋八卷

熊峻運撰峻運字在湄新建人

千家姓文一卷

崔冕撰冕字貢收巢縣人

類姓登科考六卷

不著撰人名氏

臣等謹按宋謝維新合璧事類所纂諸姓故實以

百家姓爲次此本蓋倣其例爲之間有希姓爲百家姓所不載者亦附錄云

同姓名錄八卷

王廷燦撰廷燦錢塘人康熙辛酉舉人官崇明縣知縣

同人傳四卷

陳祥裔撰祥裔見史類

別號錄九卷

葛萬里撰萬里號夢舫崑山人

右譜牒

欽定天祿琳琅書目十卷

乾隆四十年奉

敕撰

臣等謹按乾隆九年內直諸臣奉

詔編排

內廷祕笈列架度藏於

昭仁殿

賜名曰天祿琳琅近因編纂四庫廣構遺書宛委叢編  
悉登秘府乃

命重爲補輯定著此目以經史子集爲綱書則以刊板  
朝代爲次一書而載數本則參用尤袤遂初堂書  
目例至每書詳其題跋姓名收藏印記則無用鐵  
網珊瑚例並各

親題甲乙

奎藻摘華自來冊府珍藏洵無能與之媲美也已

欽定四庫全書總目二百卷簡明目錄二十卷

乾隆四十七年奉

敕編

臣等謹按前代著錄之書若七畧七錄見於史志者部分次第多爲後人所駁正蓋其時立法未善蒐羅未廣又聽臣下意爲進退鑒別不精故無以定是非之準而滙古今之大全我

皇上典學稽古嘉惠藝林乾隆三十七年

詔求遺書四方大吏悉心採錄江南浙江好古之士各  
以其藏書來獻旋因安徽學政朱筠言永樂大典  
中多人間未見之本

命開四庫全書館於翰林院遴選儒臣詳審編覈又設  
局於

武英殿專司繕錄之事凡經史子集條分得失其善  
本則著錄其外間所稀覯者則以聚珍板廣厥流



傳其餘則附見存目每校一書進呈

乙覽仰蒙

御製詩章敷言建極式型奕禩袞鉞同昭館臣得奉以  
編摩次第甄錄四十六年編定全書三萬六千冊  
從古圖書之備未有盛於此者復綜各書提要合  
爲總目又專輯著錄各書括其簡要爲簡明目錄  
大聖人親示折衷垂定論於億載固非崇文總目諸書  
所能希踪萬一矣

千頃堂書目三十二卷

黃虞稷撰虞稷字俞邵泉州人僑寓上元

述古堂書目

無卷數

讀書敏求記四卷

錢曾撰曾字遵王自號也是翁常熟人

臣等謹按書目所載乃其藏書之總目敏求記所

載則其所藏之最佳本也仿歐陽修集古錄之例

分經史子集四門又各列以支目凡四十類云

讀書叢殘三卷

王鉞撰鉞見傳記類

經義考三百卷

朱彝尊撰彝尊字錫鬯號竹垞秀水人康熙己未  
召試博學鴻詞授翰林院檢討

陳廷敬序曰竹垞歸隱小長蘆以輯學著書自娛  
所輯經義考至三百卷之多雖其或存或佚者悉  
載簡編余以爲存者固森然其畢具而佚者亦絕  
其穿鑿附會之端則經義之存又莫有盛於此時

者矣微竹垞博學深思其孰克爲之

毛竒齡序曰竹垞於歸田之餘據疇昔所見聞合古今部記而著爲斯編曰經義考真所謂古文舊書外內相應者其所部分則

御注

敕撰一卷尊王也十四經爲經義者共二百五十八卷廣經學也逸經三卷恐經之稍有遺而一字一句必收之也毳緯五卷緯雖毳說經者也擬經十三卷

此則不惟自爲義并自爲經者也又有承師五卷  
則錄其經義之各有自者而廣譽附焉宣講立學  
合一卷刊石五卷書壁鏤板著錄各一卷通說四  
卷此皆與經學有繫者然而非博極羣籍者不能  
有此家學一卷自序一卷共三百卷孟子曰觀於  
海者難爲水遊於聖人之門者難爲言今經學大  
著聖人之言畢見於斯世復得從此而有所考鑒  
則天下後世知有經并知有義也

明藝文志五卷

尤侗撰侗字展成號悔菴又稱艮齋又號西堂長洲人由拔貢生任永平府推官康熙己未

召試博學鴻詞授翰林院檢討官至侍講

易傳辨異四卷

翟均廉撰均廉字春沚錢塘人乾隆乙酉舉人官

內閣中書

右目錄類經籍

欽定校正淳化閣帖釋文十卷

乾隆四十三年侍郎金簡恭錄

臣等謹按宋太宗命侍書王著摹刻諸家書爲淳化閣帖後之釋者不下十數家

皇上幾暇臨池辨譌匡謬

詔以內府所藏宋畢士安本詳加釐正以次取裁

御定重勒貞珉並頒

恩賚然惟大臣登二府者始得拜賜金簡以石刻貯在

禁庭陬澁未儒罕窺崖概乃恭錄釋文請以聚珍板  
摹印以廣流傳由是諸書家之墨蹟精采彌增而  
篆籀行草之奇傑者亦復人人能識並悉同異之  
原誠墨林之鴻寶爲藝苑之奇珍也已

楔帖繚聞一卷

胡世安撰世安見經類

金石表一卷

曹溶撰溶見總錄類



溶自序云余行塞上見古碑橫第草間偶一動念  
古人遺蹟歷千百年自吾世而湮沒之爲可惜搜  
自境內以至遠地積五年得八百餘本經以碑緯  
以撰者書者之姓名及所立之地與世與年合而  
成表

閒者軒帖考一卷

孫承澤撰承澤見經類

求古錄一卷 金石文字記六卷 石經考一卷

顧炎武撰炎武見經類

炎武自序金石文字記畧曰比二十年間周遊天下所至名山巨鎮祠廟伽藍之跡捫石履榛其可讀者必手自鈔錄挾剔史傳發揮經典頗有歐陽趙氏二錄之所未具者

天發神讖碑釋文一卷

周在浚撰在浚字雪客祥符人亮工之子

嵩陽石刻集記二卷

葉封撰封字井叔黃州人順治己亥進士官至工部主事

王士禎序曰封精爾雅說文訓詁工於篆隸手輯  
嵩志二十一卷復旁搜漢唐以來碑板文字別爲  
石刻集記二卷辨證精博人比之劉原父薛尚功  
云

昭陵六駿贊辨一卷 瘞鶴銘辨一卷

張弢撰弢字力臣山陽人

觀妙齋金石文考畧十六卷

李光映撰光映字子中嘉興人

金介復跋曰光映所收碑刻搨本視曹溶古林金石表不減其數乃博采諸家之論錄之以互證其然否間附已說於其後

石經考一卷

萬斯同撰斯同見經類

來齋金石考三卷

林侗撰侗字同人侯官人

臣等謹按是編總錄古今碑刻自夏迄唐凡二百二十皆據目見者書之其考證以顧炎武金石文字記爲主而以己意爲之折衷云

瘞鶴銘考一卷

汪士鋐撰士鋐字文升長洲人康熙丁丑進士官至右春坊右中允

分隸偶存二卷

萬經撰經字授一號九沙鄞縣人康熙癸未進士官翰林院編修

金石遺文錄十卷

陳奕禧撰奕禧字子文號香泉海寧人由貢生官至南安府知府

王士禎序曰奕禧於秦漢唐宋以來金石文字收藏尤富皆爲題跋辨證蓋米元章黃伯思一流人也

續金石錄

無卷數

葉萬撰萬字石君常熟人

金石續錄四卷

劉青藜撰青藜字太乙襄城人康熙丙戌進士改

庶吉士

中州金石考八卷

黃叔璥撰叔璥見傳記類

淳化秘閣法帖考正十二卷 竹雲題跋四卷

王澐撰澐見經類

澐自序法帖考正曰淳化秘閣法帖米元章始以  
所見創爲區別黃長睿更據史書考其紕繆所見  
益精而字畫淆譌未暇是正明嘉靖中上海顧汝  
和本黃米未盡之指細意較勘雖其板本皴裂字  
畫剝蝕處亦必異同並載

國朝康熙間義門何焯更以姜白石絳帖評增注其  
上徐葆光又旁搜博採益增其舊年來時時臨寫



偶有所見輒復博取羣書補正詳訂於是閣帖十卷是非同異皆有所依據書十二卷者第十一卷附古今法帖考第十二卷附論書臚語也

金石經眼錄一卷 金石圖二卷

褚峻摹圖牛運震補說峻字千峯郃陽人運震見經類

石經考異二卷

杭世駿撰世駿見經類

欽定四庫全書

卷二百二十四

厲鶚序畧曰其五經六經七經之核其實一字三字之定其歸二十五碑四十八碑之析其數堂東堂西之殊其列自洛入鄴自汴入燕之分其地馭鴻都門學非太學魏石經非邯鄲淳書直發千古之蒙滯

臣等謹按是編因顧炎武石經考採撫未備辨正未明乃爲糾訛補缺勒爲二卷上卷標目十五下卷標目三而趙信汪祚符曾諸人各抒所見互相

訂正較炎武之書頗爲完密云

石蹟記一卷

不著撰人名氏

右目錄類金石



皇朝文獻通考卷二百二十四